

Unammilleqatigiinnermut inatsit malillugu malittarisassiorneq aalajangiinernilluunniit pisortatut oqartussat nalunaarutiginninnerat pillugu Namminersornerullutik Oqartussat nalunaarutaat

Unammilleqatigiinneq pillugu inatsisartut inatsisaat nr. 16, 19. november 2007-imeersumi § 2, imm. 7
malillugu aalajangersarneqarpoq:

Nalunaartussaataitaanerup annertussusia

§ 1. Namminersornerullutik Oqartussat kommuninilu oqartussat inuutissarsiutigalugu ingerlatsineq pillugu malittarisassiortut aalajangiisartulluunniit, ingerlatsineq pisortaqaqfimmit nammineq imaluunniit suliffeqaqfimmit aqutsisutut oqartussaasup sinniisuuffigisaani ingerlanneqarpat, malittarisassiorneq aalajangiinerluunniit unammilleqatigiinnermik killiliisimappat killiliisinnaappalluunniit, malittarisassiorneq aalajangiinerluunniit Unammilleqatigiinnermut Nakkutilliisoqaqfimmut nalunaarutiginnissaaq.

Nalunaartussaataitaanerup aamma ilaapput akuersissutinik tunniussinerit.

§ 2. § 1 naapertorlugu nalunaartussaataitaanerup ilaanngillat Namminersornerullutik Oqartussat kommuninilu oqartussat malittarisassiornerat aalajangiinerilluunniit

- 1) nioqqutissanik kiffatuussinernilluunniit nammineq pisanut, naleqquttumik akuttussusilimmik naligiimmik piumasaqaatit atorlugit neqeroorutigineqarsimasunut tunngasuuppat, imaluunniit
- 2) niuernermit piumasaqaatit malillugit nioqqutissanik kiffatuussinernilluunniit nammineq pisanut tunngasuuppat.

§ 3. § 1 naapertorlugu nalunaartussaataitaanerup ilaanngilaq malittarisassiorneq aalajangernilluunniit,

- 1) tamanut saqqummiunneqarsimappat, imaluunniit
- 2) unammilleqatigiinnermik killilersuut pisortat malittarisassiornerannit toqqaannartumik pisariaqartumilluunniit kingunerippagu.

§ 4. Unammilleqatigiinnermut Ataatsimiititaliaq aalajangersimasumik nalileereernikkut aalajangersinnaavoq malittarisassiornerit aalajangiinerilluunniit unammilleqatigiinnermut anikkinnerusumik sunniuteqartut nalunaartussaataitaanerup ilaatinneqassanngitsut.

Nalunaarutiginninneq

§ 5. § 1 naapertorlugu nalunaarutiginninnermut ilanngunneqassaaq malittarisassiornerup aalajangiinerilluunniit assilinera oqartussat kikkut malittarisassiornermik aalajangiinermilluunniit akuersisimanersut, aamma inuussutissarsiutigalugu ingerlataq suna aalajangiinnermut malittarisassiornermulluunniit pineqarnerisooq nalunaarutigalugu. Malittarisassiorneq aalajangiinerlu ulloq suna akuerineqarsimanersooq aamma takuneqarsinnaassaaq.

§ 6. Malittarisassiornerup aalajangiinerullu akuerineqartarnerata kingorna kingusinnerpaamik sapaatit akunneri sisamat qaangiutsinnagit nalunaarutiginninneq Unammilleqatigiinnermut Ataatsimiititaliamut tunniunneqassaaq.

Imm. 2. Nalunaarutiginninnermi allannguinerit aamma akuerineqarnerisa kingorna sapaatit akunneri sisamat qaangiutsinnagit Unammilleqatigiinnermut Ataatsimiititaliamut nalunaarutigineqassapput.

§ 7. Unammilleqatigiinnermut Nakkutilliisoqarfiup nalunaarutiginninnermik tigusineq tigusinerup kingorna ulluinnaat kingusinnerpaamik qulit qaangiutsinnagit allakkatigut uppernassassavaa.

Tamanut saqqummiussineq

§ 8. Nalunaarummi matumani § 1-i naapertorlugu malittarisassiornermik aalajangiinnermilluunniit nalunaarutiginninneq tamanut saqqummiunneqassanersoq Unammilleqatigiinnermut Ataatsimiititaliamit aalajangerneqassaaq, takuuk unammilleqatigiinneq pillugu inatsisartut inatsisaanni § 15, imm. 2, aamma imm. 4.

Allaffissorneq naammagittaalliernerlu

§ 9. Malittarisassiorneq aalajangiinerluunniit nalunaarummi matumani § 1-i naapertorlugu nalunaartussaaitaanermut ilaanersoq Unammilleqatigiinnermut Ataatsimiititaliamit aalajangerneqassaaq.

§ 10. Nalunaarummi matumani § 1-i aamma § 8-i naapertorlugit Unammilleqatigiinnermut Ataatsimiititaliamit aalajangiinerit Nunatta Eqqartuussivianut suliaassanngortinneqarsinnaapput, takuuk unammilleqatigiinneq pillugu inatsisartut inatsisaanni § 26.

Atulersinnerani ikaarsaarnermilu aalajangersakkat

§ 11. Namminersornerullutik Oqartussat kommunillu malittarisassiornerit aalajangiinerilluunniit, nalunaarummi matumani § 1-i naapertorlugu nalunaarutigineqartussat, 1. martsillu 2008-mi atuuttuusut, 1. septemberip 2008 nallertinnagu Unammilleqatigiinnermut Nakkutilliisoqarfimmut nalunaarutigineqassapput.

§ 12. Nalunaarut manna 1. julip 2008-mi atulissaaq.

Namminersornerullutik Oqartussat, ulloq 27. juni 2008

Siverth K. Heilmann

/

Bent A. Sørensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut